

上經

乾卦第一

乾下 乾上

○乾。元亨，利貞。

○初九，潛龍勿用。

○九二，見龍再田，利見大人。

○九三，君子終日乾乾，夕惕若；厲無咎。

○九四，或躍在淵，無咎。

○九五，飛龍在天，利見大人。

○上九，亢龍有悔。

○用九，見群龍無首，吉。

◎彖曰：大哉乾元，萬物資始，乃統天。雲行雨施，品物流形。大明始終，六位時成，時乘六龍以禦天。乾道變化，各正性命，保合大和，乃利貞。首出庶物，萬國鹹寧。

◎象曰：天行健，君子以自彊不息。

◎潛龍勿用，陽在下也。

◎見龍在田，德施普也。

◎終日乾乾，反復道也。

◎或躍在淵，進無咎也。

◎飛龍在天，大人造也。

◎亢龍有悔，盈不可久也。

◎用九，天德不可爲首也。

◎文言曰：元者，善之長也；亨者，嘉之會也；利者，義之和也；貞者，事之幹也。君子體仁，足以長人；嘉會，足以合禮；利物，足以和義；貞固，足以幹事；君子行此四德者，故曰：「乾，元亨利貞。」

◎初九曰「潛龍勿用」，何謂也？子曰：「龍德而隱者也。不易乎世，不成乎名，遯世而無悶，不見是而無悶，樂則行之，憂則違之，確乎其不可拔，潛龍也。」

九二曰「見龍在田，利見大人」，何謂也？子曰：「龍德而正中者也。庸言之信，庸行之謹，閑邪存其誠，善世而不伐，德博而化。易曰：「見龍在田，利見大人」君德也。」

九三曰「君子終日乾乾，夕惕若，厲無咎」何謂也？子曰：「君子進德修業，忠信，所以進德也。修辭立其誠，所以居業也。知至至之，可與幾也。知終終之，可與存義也。是故居上位而不驕，在下位而不憂。故乾乾因其時而惕，雖危而無咎矣。」

九四「或躍在淵，無咎」何謂也？子曰：「上下無常，非爲邪也。進退無恒，非離群也。君子進德修業，欲及時也，故無咎。」

九五曰「飛龍在天，利見大人」何謂也？子曰：「同聲相應，同氣相求；水流濕，火就燥；雲從龍，風從虎。聖人作，而萬物睹，本乎天者親上，本乎地者親下，則各從其類也。」

上九曰「亢龍有悔。」何謂也？子曰：「貴而無位，高而無民，賢人在下而無輔，是以動而有悔也。」

◎潛龍勿用，下也；見龍在田，時舍也；終日乾乾，行事也；或躍在淵，自試也；飛龍在天，上治也。；亢龍有悔，窮之災也；乾元用九，天下治也。

◎潛龍勿用，陽氣潛藏；見龍在田，天下文明；終日乾乾，與時偕行；或躍在淵，乾道乃革；飛龍在天，乃位乎天德；亢龍有悔，與時偕極；乾元用九，乃見天則。

◎乾元者，始而亨者也；利貞者，性情也。乾始，能以美利利天下，不言所利。大矣哉！大哉乾乎！剛健中正，純粹精也；六爻發揮，旁通情也；時乘六龍，以御天也；雲行雨施，天下平也。

◎君子以成德爲行，日可見之行也。潛之爲言也，隱而未見，行而未成，是以君子弗用也。君子學以聚之，問以辯之，寬以居之，仁以行之。易曰：「見龍在田，利見大人」，君德也。九三重剛而不中，上不在天，下不在田，故乾乾因其時而惕，雖危無咎矣。九四重剛而不中，上不在天，下不在田，中不在人，故或之。或之者，疑之也，故無咎。夫大人者，與天地合其德，與日月合其明，與四時合其序，與鬼神合其吉凶。先天下而天弗違，後天而奉天時。天且弗違，而況於人乎？況於鬼神乎？亢之爲言也，知進而不知退，知存而不知亡，知得而不知喪。其唯聖人乎？知進退存亡，而不失其正者，其唯聖人乎？

坤卦第二

坤下 坤上

○坤。元亨，利牝馬之貞。君子有攸往。先迷，後得，主利。西南得朋，東北喪朋。安貞，吉。

◎彖曰：至哉坤元，萬物資生，乃順承天。坤厚載物，德合無疆；含弘光大，品物咸亨。牝馬地類，行地無疆；柔順利貞，君子攸行。先迷失道，後順得常。西南得朋，乃與類行；東北喪朋，乃終有慶。安貞之吉，應地無疆。

◎象曰：地勢坤。君子以厚德載物。

○初六，履霜，堅冰至。

◎象曰：履霜堅冰，陰始凝也。馴致其道，至堅冰也。

○六二，直方大，不習無不利。

◎象曰：六二之動，直以方也；不習無不利，地道光也。

○六三，含章可貞。或從王事，無成有終。

◎象曰：含章可貞，以時發也；或從王事，知光大也。

○六四，括囊，無咎無譽。

◎象曰：括囊無咎，慎不害也。

○六五，黃裳，元吉。

◎象曰：黃裳元吉，文在中也。

○上六，戰龍于野，其血玄黃。

◎象曰：戰龍於于野，其道窮也。

○用六，利永貞。

◎象曰：用六永貞，以大終也。

◎文言曰：坤，至柔而動也剛，至靜而德方，後得主而有常，含萬物而化光。坤道其順乎！承天而時行。

◎積善之家，必有餘慶；積不善之家，必有餘殃。臣弑其君，子弑其父，非一朝一夕之故，其所由來者漸矣，由辯之不早辯也。易曰：「履霜，堅冰至」，蓋言順也。直，其正也；方，其義也。君子敬以直內，義以方外，敬義立而德不孤。直方大，不習無不利，則不疑其所行也。陰雖有美含之，以從王事，弗敢成也。地道也，妻道也，臣道也。地道無成而代有終也。天地變化，草木蕃；天地閉，賢人隱。易曰：「括囊無咎無譽」，蓋言謹也。君子黃中通理，正位居體，美在其中，而暢於四支，發於事業，美之至也。陰疑於陽，必戰。爲其嫌於無陽也，故稱龍焉；猶未離其類也，故稱血焉。夫玄黃者，天地之雜也，天玄而地黃。

屯卦第三

震下 坎上

○屯。元亨，利貞。勿用有攸往。利建侯。

◎象曰：屯，剛柔始交而難生。動乎險中，大亨貞。雷雨之動滿盈，天造草昧，宜建侯而不寧。

◎象曰：雲雷，屯；君子以經綸。

○初九，磐桓，利居貞，利建侯。

◎象曰：雖磐桓，志行正也；以貴下賤，大得民也。

○六二，屯如遭如；乘馬班如，匪寇，婚媾；女子貞不字，十年乃字。

◎象曰：六二之難，乘剛也；十年乃字，反常也。

○六三，既鹿無虞，惟入于林中；君子幾，不如舍，往吝。

◎象曰：既鹿無虞，以從禽也；君子舍之，往吝，窮也。

○六四，乘馬班如，求婚媾；往，吉，無不利。

◎象曰：求而往，明也。

○九五，屯其膏。小，貞吉；大，貞凶。

◎象曰：屯其膏，施未光也。

○上六，乘馬班如，泣血漣如。

◎象曰：泣血漣如，何可長也？

蒙卦第四

坎下 艮上

○蒙。亨。匪我求童蒙，童蒙求我。初噬告，再三瀆，瀆則不告。利貞。

◎象曰：蒙，山下有險，險而止，蒙。蒙，亨，以亨行時中也。匪我求童蒙，童蒙求我，志應也。初噬告，以剛中也。再三瀆，瀆則不告，瀆蒙也。蒙以養正，聖功也。

◎象曰：山下出泉，蒙；君子以果行育德。

○初六，發蒙，利用刑人，用說桎梏；以往，吝。

◎象曰：利用刑人，以正法也。

○九二，包蒙，吉。納婦，吉；子克家。

◎象曰：子克家，剛柔接也。

○六三，勿用取女。見金夫，不有躬，無攸利。

◎象曰：勿用取女，行不順也。

○六四，困蒙，吝。

◎象曰：困蒙之吝，獨遠實也。

○六五，童蒙，吉。

◎象曰：童蒙之吉，順以巽也。

○上九，擊蒙，不利爲寇，利禦寇。

◎象曰：利用禦寇，上下順也。

需卦第五

乾下 坎上

○需。有孚，光亨，貞吉。利涉大川。

◎象曰：需，須也；險在前也。剛健而不陷，其義不困窮矣。需，有孚，光亨，貞吉，位乎天位，以正中也。利涉大川，往有功也。

◎象曰：雲上於天，需；君子以飲食宴樂。

○初九，需于郊，利用恒，無咎。

◎象曰：需于郊，不犯難行也；利用恒，無咎；未失常也。

○九二，需于沙，小有言，終吉。

◎象曰：需于沙，衍在中也；雖小有言，以吉終也。

○九三，需于泥，致寇至。

◎象曰：需於泥，災在外也；自我致寇，敬慎不敗也。

○六四，需于血，出自穴。

◎象曰：需于血，順以聽也。

○九五，需于酒食，貞吉。

◎象曰：酒食貞吉，以中正也。

○上六，入于穴，有不速之客三人來，敬之終吉。

◎象曰：不速之客來，敬之終吉；雖不當位，未大失也。

訟卦第六

坎下 乾上

○訟，有孚窒，惕，中吉；終凶。利見大人，不利涉大川。

◎象曰：訟，上剛下險，險而健，訟。訟，有孚窒，惕，中吉，剛來而得中也；終凶，訟不可成也；利見大人，尙中正也；不利涉大川，入于淵也。

- ◎象曰：天與水違行，訟；君子以作事謀始。
- 初六，不永所事，小有言，終吉。
◎象曰：不永所事，訟不可長也；雖有小言，其辯明也。
- 九二，不克訟，歸而逋，其邑人三百戶，無眚。
◎象曰：不克訟，歸而捕竄也；自下訟上，患至掇也。
- 六三，食舊德，貞厲，終吉；或從王事，無成。
◎象曰：食舊德，從上吉也。
- 九四，不克訟，復即命；渝，安貞，吉。
◎象曰：復即命，渝，安貞不失也。
- 九五：訟，元吉。
◎象曰：訟，元吉，以中正也。
- 上九：或錫之鞶帶，終朝三褫之。
◎象曰：以訟受服，亦不足敬也。

師卦第七

坎下 坤上

- 師。貞，丈人吉，無咎。

◎彖曰：師，眾也；貞，正也；能以眾正，可以王矣。剛中而應，行險而順，以此毒天下，而民從之，吉又何咎矣。

◎象曰：地中有水，師；君子以容民畜眾。

- 初六，師出以律，否臧凶。
◎象曰：師出以律，失律凶也。
- 九二，在師，中，吉，無咎，王三錫命。
◎象曰：在師中吉，承天寵也。王三錫命，懷萬邦也。
- 六三，師或輿尸，凶。
◎象曰：師或輿尸，大無功也。
- 六四，師左次，無咎。
◎象曰：左次無咎，未失常也。

○六五，田有禽，利執言，無咎。長子帥師，弟子輿尸，貞凶。

◎象曰：長子帥師，以中行也。弟子輿師尸，使不當也。

○上六，大君有命，開國承家，小人勿用。

◎象曰：大君有命，以正功也；小人勿用，必亂邦也。

比卦第八

坤下 坎上

○比。吉。原筮，元永貞，無咎。不寧方來，後夫凶。

◎象曰：比，吉也；比，輔也，下順從也。原筮元永貞，無咎，以剛中也。不寧方來，上下應也。後夫凶，其道窮也。

◎象曰：地上有水，比；先王以建萬國，親諸侯。

○初六，有孚比之，無咎。有孚盈缶，終來有他它吉。

◎象曰：比之初六，有他它吉也。

○六二，比之自內，貞吉。

◎象曰：比之自內，不自失也。

○六三，比之匪人。

◎象曰：比之匪人，不亦傷乎？

○六四，外比之，貞吉。

◎象曰：外比於賢，以從上也。

○九五，顯比。王用三驅，失前禽，邑人不誠，吉。

◎象曰：顯比之吉，位正中也；舍逆取順，失前禽也；邑人不誠，上使中也。

○上六，比之無首，凶。

◎象曰：比之無首，無所終也。

小畜卦第九

乾下 巽上

○小畜。亨。密雲不雨，自我西郊。

◎彖曰：小畜。柔得位而上下應之，曰小畜。健而巽，剛中而志行，乃亨。密雲不雨，尚往也；自我西郊，施未行也。

◎象曰：風行天上，小畜；君子以懿文德。

○初九，復自道，何其咎？吉。

◎象曰：復自道，其義吉也。

○九二，牽復，吉。

◎象曰：牽復在中，亦不自失也。

○九三，輿說輻。夫妻反目。

◎象曰：夫妻反目，不能正室也。

○六四，有孚，血去惕出，無咎。

◎象曰：有孚惕出，上合志也。

○九五，有孚攣如，富以其鄰。

◎象曰：有孚攣如，不獨富也。

○上九，既雨既處，尚德載，婦貞厲。月幾望，君子征凶。

◎象曰：既雨既處，德積載也；君子征凶，有所疑也。

履卦第十

兌下 乾上

○履虎尾，不咥人。亨。

◎彖曰：履，柔履剛也；說而應乎乾，是以履虎尾，不咥人，亨。剛中正，履帝位而不疚，光明也。

◎象曰：上天下澤，履；君子以辯上下，安民志。

○初九，素履，往無咎。

◎象曰：素履之往，獨行願也。

○九二，履道坦坦，幽人貞吉。

◎象曰：幽人貞吉，中不自亂也。

○六三：眇能視，跛能履，履虎尾，咥人，凶。武人爲于大君。

◎象曰：眇能視，不足以有明也。跛能履，不足以與行也。咥人之凶，位不當也。武人爲于大君，志剛也。

○九四，履虎尾，愬愬，終吉。

◎象曰：愬愬終吉，志行也。

○九五：夬履，貞厲。

◎象曰：夬履貞厲，位正當也。

○上九，視履考祥，其旋元吉。

◎象曰：元吉在上，大有慶也。

泰卦第十一

乾下 坤上

○泰。小往大來，吉亨。

◎象曰：泰，小往大來，吉亨。則是天地交而萬物通也，上下交而其志同也。內陽而外陰，內健而外順，內君子而外小人，君子道長，小人道消也。

◎象曰：天地交，泰；後以財（裁）成天地之道，輔相天地之宜，以左右民。

○初九，拔茅茹，以其夤，征吉。

◎象曰：拔茅征吉，志在外也。

○九二，包荒，用馮河；不遐遺，朋亡，得尚于中行。

◎象曰：包荒，得尚于中行，以光大也。

○九三，無平不陂，無往不復；艱貞，無咎；勿恤其孚，于食有福。

◎象曰：無往不復，天地際也。

○六四，翩翩不富以其鄰，不戒以孚。

◎象曰：翩翩不富，皆失實也。不戒以孚，中心願也。

○六五，帝乙歸妹，以祉元吉。

◎象曰：以祉元吉，中以行願也。

○上六，城復于隍，勿用師，自邑告命，貞吝。

◎象曰：城復于隍，其命亂也。

否卦第十二

坤下 乾上

○否之匪人，不利君子貞，大往小來。

◎象曰：否之匪人，不利君子貞，大往小來。則是天地不交而萬物不通也，上下不交而天下無邦也，內陰而外陽，內柔而外剛，內小人而外君子，小人道長，君子道消也。

◎象曰：天地不交，否；君子以儉德辟難，不可榮以祿。

○初六，拔茅茹，以其資，貞吉，亨。

◎象曰：拔茅貞吉，志在君也。

○六二，包承，小人吉，大人否，亨。

◎象曰：大人否亨，不亂群也。

○六三，包羞。

◎象曰：包羞，位不當也。

○九四，有命，無咎，疇離祉。

◎象曰：有命無咎，志行也。

○九五，休否，大人吉。其亡其亡，繫于苞桑。

◎象曰：大人之吉，位正當也。

○上九，傾否，先否後喜。

◎象曰：否終則傾，何可長也。

同人卦第十三

離下 乾上

○同人。于野，亨。利涉大川，利君子貞。

◎象曰：同人，柔得位得中而應乎乾，曰同人。同人曰：同人于野，亨，利涉大川；乾行也。文明以健，中正而應，君子正也。唯君子爲能通天下之志。

◎象曰：天與火，同人；君子以類族辨物。

○初九，同人于門，無咎。

◎象曰：出門同人，又誰咎也。

○六二，同人于宗，吝。

◎象曰：同人于宗，吝道也。

- 九三，伏戎于莽，升其高陵，三歲不興。
◎象曰：伏戎于莽，敵剛也；三歲不興，安行也。
- 九四，乘其墉，弗克攻，吉。
◎象曰：乘其墉，義弗克也；其吉，則困而反則也。
- 九五，同人，先號咷而後笑，大師克相遇。
◎象曰：同人之先，以中直也；大師相遇，言相克也。
- 上九，同人于郊，無悔。
◎象曰：同人于郊，志未得也。

大有卦第十四

乾下 離上

- 大有。元亨。

◎彖曰：大有，柔得尊位，大中，而上下應之，曰大有。其德剛健而文明，應乎天而時行，是以元亨。

◎象曰：火在天上，大有；君子以竭惡揚善，順天休命。
- 初九，無交害，匪咎，艱則無咎。
◎象曰：大有初九，無交害也。
- 九二，大車以載，有攸往，無咎。
◎象曰：大車以載，積中不敗也。
- 九三，公用亨于天子，小人弗克。
◎象曰：公用亨于天子，小人害也。
- 九四，匪其彭，無咎。
◎象曰：匪其彭，無咎，明辨晳也。
- 六五，厥孚交如，威如，吉。
◎象曰：厥孚交如，信以發志也；威如之吉，易而無備也。
- 上九，自天佑之，吉無不利。
◎象曰：大有上吉，自天佑也。

謙卦第十五

艮下 坤上

○謙。亨，君子有終。

◎彖曰：謙亨。天道下濟而光明，地道卑而上行。天道虧盈而益謙，地道變盈而流謙，鬼神害盈而福謙，人道惡盈而好謙；謙尊而光，卑而不可踰，君子之終也。

◎象曰：地中有山，謙；君子以裒多益寡，稱物平施。

○初六，謙謙君子，用涉大川，吉。

◎象曰：謙謙君子，卑以自牧也。

○六二，鳴謙，貞吉。

◎象曰：鳴謙貞吉，中心得也。

○九三，勞謙，君子有終，吉。

◎象曰：勞謙君子，萬民服也。

○六四，無不利，撝謙。

◎象曰：無不利，撝謙，不違則也。

○六五：不富以其鄰，利用侵伐，無不利。

◎象曰：利用侵伐，征不服也。

○上六，鳴謙，利用行師，征邑國。

◎象曰：鳴謙，志未得也。可用行師，征邑國也。

豫卦第十六

坤下 震上

○豫。利建侯行師。

◎彖曰：豫，剛應而志行，順以動，豫。豫，順以動，故天地如之，而況建侯行師乎？天地以順動，故日月不過而四時不忒；聖人以順動，則刑罰清而民服。豫之時義大矣哉！

◎象曰：雷出地奮，豫；先王以作樂崇德，殷薦之上帝，以配祖考。

○初六，鳴豫，凶。

◎象曰：初六鳴豫，志窮凶也。

○六二，介於石，不終日，貞吉。

◎象曰：不終日貞吉，以中正也。

○六三，盱豫，悔；遲，有悔。

◎象曰：盱豫有悔，位不當也。

○九四，由豫，大有得。勿疑。朋盍簪。

◎象曰：由豫，大有得，志大行也。

○六五，貞疾，恒不死。

◎象曰：六五貞疾，乘剛也；恒不死，中未亡也。

○上六，冥豫，成有渝。無咎。

◎象曰：冥豫在上，何可長也。

隨卦第十七

震下 兌上

○隨。元亨，利貞。無咎。

◎象曰：隨，剛來而下柔，動而說，隨。大亨貞，無咎，而天下隨時，隨之時義大矣哉！

◎象曰：澤中有雷，隨；君子以嚮晦入宴息。

○初九，官有渝，貞吉；出門交有功。

◎象曰：官有渝，從正吉也；出門交有功，不失也。

○六二，係小子，失丈夫。

◎象曰：係小子，弗兼與也。

○六三，係丈夫，失小子。隨有求得，利居貞。

◎象曰：係丈夫，志舍下也。

○九四，隨有獲，貞凶。有孚在道，以明，何咎？

◎象曰：隨有獲，其義凶也。有孚在道，明功也。

○九五，孚于嘉，吉。

◎象曰：孚于嘉，吉，位正中也。

○上六，拘係之，乃從；維之，王用亨于西山。

◎象曰：拘係之，上窮也。

蠱卦第十八

巽下 艮上

○蠱。元亨，利涉大川。先甲三日，後甲三日。

◎象曰：蠱，剛上而柔下，巽而止，蠱。蠱，元亨而天下治也。利涉大川，往有事也。先甲三日，後甲三日，終則有始，天行也。

◎象曰：山下有風，蠱；君子以振民育德。

○初六，幹父之蠱，有子，考無咎，厲，終吉。

◎象曰：幹父之蠱，意承考也。

○九二，幹母之蠱，不可貞。

◎象曰：幹母之蠱，得中道也。

○九三，幹父之蠱，小有悔，無大咎。

◎象曰：幹父之蠱，終無咎也。

○六四，裕父之蠱，往，見吝。

◎象曰：裕父之蠱，往未得也。

○六五，幹父之蠱，用譽。

◎象曰：幹父之蠱，承以德也。

○上九，不事王侯，高尚其事。

◎象曰：不事王侯，志可則也。

臨卦第十九

兌下 坤上

○臨。元亨，利貞。至于八月有凶。

◎象曰：臨，剛浸而長，說而順，剛中而應，大亨以正，天之道也。至于八月有凶，消不久也。

◎象曰：澤上有地，臨；君子以教思無窮，容保民無疆。

○初九，咸臨，貞吉。

◎象曰：咸臨貞吉，志行正也。

○九二，咸臨，吉，無不利。

◎象曰：咸臨，吉無不利，未順命也。

○六三，甘臨，無攸利。既憂之，無咎。

◎象曰：甘臨，位不當也；既憂之，咎不長也。

○六四，至臨，無咎。

◎象曰：至臨無咎，位當也。

○六五，知臨，大君之宜，吉。

◎象曰：大君之宜，行中之謂也。

○上六，敦臨，吉，無咎。

◎象曰：敦臨之吉，志在內也。

觀卦第二十

坤下 巽上

○觀。盥而不薦。有孚顒若。

◎象曰：大觀在上，順而巽，中正以觀天下。觀，盥而不薦，有孚顒若，下觀而化也。觀天之神道，而四時不忒；聖人以神道設教，而天下服矣。

◎象曰：風行地上，觀；先王以省方，觀民設教。

○初六，童觀，小人無咎，君子吝。

◎象曰：初六童觀，小人道也。

○六二，窺觀，利女貞。

◎象曰：窺觀女貞，亦可醜也。

○六三，觀我生，進退。

◎象曰：觀我生進退，未失道也。

○六四，觀國之光，利用賓于王。

◎象曰：觀國之光，尚賓也。

○九五，觀我生，君子，無咎。

◎象曰：觀我生，觀民也。

○上九，觀其生，君子，無咎。

◎象曰：觀其生，志未平也。

噬嗑卦第二十一

震下 離上

◎噬嗑。亨，利用獄。

◎象曰：頤中有物，曰噬嗑。噬嗑而亨，剛柔分，動而明，雷電合而章。柔得中而上行，雖不當位，利用獄也。

◎象曰：雷電，噬嗑；先王以明罰勅法。

○初九，履校滅趾，無咎。

◎象曰：履校滅趾，不行也。

○六二，噬膚滅鼻，無咎。

◎象曰：噬膚滅鼻，乘剛也。

○六三，噬腊肉，遇毒，小吝，無咎。

◎象曰：遇毒，位不當也。

○九四，噬乾肺，得金矢。利艱貞，吉。

◎象曰：利艱貞，吉，未光也。

○六五，噬乾肉，得黃金，貞厲，無咎。

◎象曰：貞厲，無咎，得當也。

○上九，何校滅耳，凶。

◎象曰：何校滅耳，聰不明也。

賁卦第二十二

離下 艮上

○賁。亨，小利有攸往。

◎象曰：賁，亨，柔來而文剛，故亨；分剛上而文柔，故小利有攸往。剛柔交錯，天文也；文明以止，人文也。觀乎天文，以察時變；觀乎人文，以化成天下。

◎象曰：山下有火，賁。君子以明庶政，無敢折獄。

○初九，賁其趾，舍車而徒。

◎象曰：舍車而徒，義弗乘也。

○六二，賁其須。

◎象曰：賁其須，與上興也。

○九三，賁如，濡如，永貞吉。

◎象曰：永貞之吉，終莫之陵也。

○六四，賁如，皤如。白馬翰如，匪寇，婚媾。

◎象曰：六四，當位疑也，匪寇婚媾，終無尤也。

○六五，賁於丘園，束帛戔戔，吝，終吉。

◎象曰：六五之吉，有喜也。

○上九，白賁，無咎。

◎象曰：白賁無咎，上得志也。

剝卦第二十三

坤下 艮上

○剝。不利有攸往。

◎象曰：剝，剝也，柔變剛也。不利有攸往，小人長也。順而止之，觀象也。君子尚消息盈虛，天行也。

◎象曰：山附於地，剝；上以厚下安宅。

○初六，剝床以足，蔑，貞凶。

◎象曰：剝削以足，以滅下也。

○六二，剝床以辨，蔑，貞凶。

◎象曰：剝床以辨，未有與也。

○六三，剝之，無咎。

◎象曰：剝之無咎，失上下也。

○六四，剝床以膚，凶。

◎象曰：剝床以膚，切近災也。

○六五，貫魚以宮人寵，無不利。

◎象曰：以宮人寵，終無尤也。

○上九，碩果不食，君子得輿，小人剝廬。

◎象曰：君子得輿，民所載也；小人剝廬，終不可用也。

復卦第二十四

震下 坤上

○復。亨，出入無疾，朋來無咎。反復其道，七日來復，利有攸往。

◎象曰：復，亨，剛反，動而以順行，是以出入無疾，朋來無咎。反復其道，七日來復，天行也。利有攸往，剛長也。復，其見天地之心乎？

◎象曰：雷在地中，復；先王以至日閉關，商旅不行，後不省方。

○初九，不遠復，無祇悔，元吉。

◎象曰：不遠之復，以修身也。

○六二，休復，吉。

◎象曰：休復之吉，以下仁也。

○六三，頻復，厲，無咎。

◎象曰：頻復之厲，義無咎也。

○六四，中行，獨復。

◎象曰：中行獨復，以從道也。

○六五，敦復，無悔。

◎象曰：敦復，無悔，中以自考也。

○上六，迷復，凶，有災眚。用行師，終有大敗，以其國君凶，至於十年，不克征。

◎象曰：迷復之凶，反君道也。

無妄卦第二十五

震下 乾上

○無妄，元亨，利貞；其匪正，有眚，不利有攸往。

◎象曰：無妄，剛自外來而為主於內，動而健，剛中而應，大亨以正，天之命也。其匪正有眚，不利有攸往。無妄之往，何之矣？天命不祐，行矣哉？

◎象曰：天下雷行，物與無妄；先王以茂對時，育萬物。

- 初九，無妄，往吉。
◎象曰：無妄之往，得志也。
- 六二，不耕獲，不菑畲，則利有攸往。
◎象曰：不耕獲，未富也。
- 六三，無妄之災，或繫之牛，行人之得，邑人之災。
◎象曰：行人得牛，邑人災也。
- 九四，可貞，無咎。
◎象曰：可貞無咎，固有之也。
- 九五，無妄之疾，勿藥，有喜。
◎象曰：無妄之藥，不可試也。
- 上九，無妄，行有眚，無攸利。
◎象曰：無妄之行，窮之災也。

大畜卦第二十六
乾下 艮上

- 大畜。利貞。不家食，吉，利涉大川。

◎象曰：大畜，剛健篤實輝光，日新其德，剛上而尚賢。能止健，大正也。不家食吉，養賢也。利涉大川，應乎天也。

◎象曰：天在山中，大畜；君子以多識前言往行，以畜其德。
- 初九，有厲，利已。
◎象曰：有厲利已，不犯災也。
- 九二，輿說輹。
◎象曰：輿說輹，中無尤也。
- 九三，良馬逐，利艱貞。曰閑輿衛，利有攸往。
◎象曰：利有攸往，上合志也。
- 六四，童牛之牯，元吉。
◎象曰：六四元吉，有喜也。
- 六五，豮豕之牙，吉。
◎象曰：六五之吉，有慶也。

- 上九，何天之衢，亨。
◎象曰：何天之衢，道大行也。

頤卦第二十七
震下 艮上

- 頤。貞吉。觀頤，自求口實。

◎彖曰：頤，貞吉，養正則吉也。觀頤，觀其所養也；自求口實，觀其自養也。天地養萬物，聖人養賢以及萬民。頤之時義大矣哉！

◎象曰：山下有雷，頤；君子以慎言語，節飲食。

- 初九，舍爾靈龜，觀我朵頤，凶。
◎象曰：觀我朵頤，亦不足貴也。

- 六二，顛頤，拂經；于丘頤，征凶。
◎象曰：六二征凶，行失類也。

- 六三，拂頤，貞凶，十年勿用，無攸利。
◎象曰：十年勿用，道大悖也。

- 六四，顛頤，吉。虎視眈眈，其欲逐逐，無咎。
◎象曰：顛頤之吉，上施光也。

- 六五，拂經，居貞吉，不可涉大川。
◎象曰：居貞之吉，順以從上也。

- 上九，由頤，厲吉，利涉大川。
◎象曰：由頤厲吉，大有慶也。

大過卦第二十八
巽下 兌上

- 大過。棟橈，利有攸往，亨。

◎彖曰：大過，大者過也；棟橈，本末弱也。剛過而中，巽而說行，利有攸往，乃亨。大過之時義大矣哉！

◎象曰：澤滅木，大過；君子以獨立不懼，遯世無悶。

○初六，藉用白茅，無咎。

◎象曰：藉用白茅，柔在下也。

○九二，枯楊生稊，老夫得其女妻，無不利。

◎象曰：老夫女妻，過以相與也。

○九三，棟橈，凶。

◎象曰：棟橈之凶，不可以有輔也。

○九四，棟隆，吉；有它，吝。

◎象曰：棟隆之吉，不橈乎下也。

○九五，枯楊生華，老婦得其士夫，無咎無譽。

◎象曰：枯楊生華，何可久也。老婦士夫，亦可醜也。

○上六：過涉滅頂，凶，無咎。

◎象曰：過涉之凶，不可咎也。

坎卦第二十九

坎下 坎上

○習坎。有孚，維心亨，行有尚。

◎象曰：習坎，重險也。水流而不盈。行險而不失其信。維心亨，乃以剛中也。行有尚，往有功也。天險，不可升也；地險，山川丘陵也，王公設險以守其國，險之時用大矣哉！

◎象曰：水洊至，習坎；君子以常德行，習教事。

○初六，習坎，入于坎窞，凶。

◎象曰：習坎入坎，失道凶也。

○九二：坎有險，求小得。

◎象曰：求小得，未出中也。

○六三：來之坎坎，險且枕，入於坎窞，勿用。

◎象曰：來之坎坎，終無功也。

○六四：樽酒簋二，用缶，納約自牖，終無咎。

◎象曰：樽酒簋二，剛柔際也。

○九五：坎不盈，只既平，無咎。

◎象曰：坎不盈，中未大也。

○上六：係用徽纆，寘於叢棘，三歲不得，凶。

◎象曰：上六失道，凶三歲也。

離卦第三十

離下 離上

○離：利貞，亨。畜牝牛，吉。

◎象曰：離，麗也；日月麗乎天，百穀草木麗乎土，重明以麗乎正，乃化成天下。柔麗乎中正，故亨；是以畜牝牛吉也。

◎象曰：明兩作離，大人以繼明照于四方。

○初九：履錯然，敬之無咎。

◎象曰：履錯之敬，以辟咎也。

○六二：黃離，元吉。

◎象曰：黃離元吉，得中道也。

○九三：日昃之離，不鼓缶而歌，則大耋之嗟，凶。

◎象曰：日昃之離，何可久也。

○九四：突如其來如，焚如，死如，棄如。

◎象曰：突如其來如，無所容也。

○六五：出涕沱若，戚嗟若，吉。

◎象曰：六五之吉，離王公也。

○上九：王用出征，有嘉折首，獲其匪醜，無咎。

◎象曰：王用出征，以正邦也。